

Nakon oslobođenja, 6. aprila 1945. godine, počinje svestrani razvoj u kojem dolazi do punog izražaja stvaralački zanos naroda ovog kraja.

Sarajevo je danas upravni, privredni, naučni, kulturni i obrazovni centar Bosne i Hercegovine. Gotovo svaki treći stanovnik je učenik ili student. U gradu ima 115 osnovnih, 81 srednja i 26 viših i visokih škola, 254 kulturne ustanove među kojima Zemaljski muzej, Muzej Revolucije, Muzej grada, Muzej »Mlade Bosne«, Akademija nauka i umjetnosti BiH, Narodno pozorište, Kulturno-sportski centar Skenderija, umjetničke galerije i mnoge druge kulturne i naučne institucije.

Sarajevo je po veličini teritorije drugi, a po broju stanovnika četvrti grad u Jugoslaviji. Na njegovoj teritoriji od 2.049 kvadratnih kilometara živi, po popisu iz 1981. godine, 448.500 stanovnika. Najviše je Muslimana – 189.138, zatim Srba 132.637, Hrvata 36.713, Crnogoraca 4.819, Albanaca 1.326, Slovenaca 794, Makedonaca 548, Jevreja 276, Čeha 129, te još 15 nacionalnosti. Ovaj popis također je pokazao da se 71.515 stanovnika Sarajeva nacionalno opredijelilo kao Jugosloveni, dok se za 4.496 ne zna nacionalna pripadnost. Više od 160.000 građana Sarajeva je zaposleno.

Grad je sa svijetom povezan velikim brojem linija modernog željezničkog, drumskog i zračnog saobraćaja. Centar je zimskih, posebno skijaških sportova. Sportskim i rekreativnim aktivnostima bavi se oko 50.000 građana, uključenih u oko 140 klubova, 90 društava za fizičku kulturu u mjesnim zajednicama i organizacijama udruženog rada i u oko 80 društava u školama i na fakultetima.

Na relativno malom prostoru koncentrisani su urbano-arhitektonski stilovi i građevine različitih epoha i civilizacija: džamije, sahat-kule, medrese, tekije, bezistani i hanovi, katedrale, klosteri i crkve, sinagoge, mostovi, sokaci

i – srednjovjekovni orijentalni zanatsko-trgovinski centar Bašćaršija u kojoj i oko koje se danas u 500 radnji praktikuje 68 starih zanata.

Desetak kilometara zapadno od centra grada, u podnožju Igmana, izvire rijeka Bosna. Tu je, u blizini, još iz rimskog perioda poznato lječilište Banja Ilidža, sa 800 izvora termalne ljekovite vode.